

Ո Ր Ո Շ ՈՒ Մ

Ճանապարհային ոստիկանության վարչական իրավախախտումների վերաբերյալ գործերով
20.03.2023թ. կայացված ԱՆ075608 և ԱՆ075609 որոշումներն անփոփոխ, իսկ վարչական
բողոքներն առանց բավարարման թողնելու մասին

<<08>> 05 2023թ. 7-13- 4314

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս,
վերանայելով Խաչատուր Իվանյանի ՄԴ/26750-23 և ՄԴ/26754-23 դիմումների քննարկման
արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Խաչատուր Իվանյանը (**ծանուցման հասցե՝** Արմավիրի մարզ, գյուղ
Բամբակաշատ, 15-րդ փողոց, 2-րդ նրբանցք, 4-րդ տուն) դիմումներով իր
անհամաձայնությունն է հայտնել Ճանապարհային ոստիկանության վարչական
իրավախախտումների վերաբերյալ գործերով կայացված ԱՆ075608 և ԱՆ075609
որոշումներին՝ նշելով, որ տրանսպորտային միջոցը վարել է ամրակապված վիճակում և
ուղևորն է ծխել։ Ի լրումն իր դիմումների դիմումատուն հայտնել է նաև, որ պնդում է
դիմումներում նշված հանգամանքները, ավելացնելու ոչինչ չունի և խնդրել է դիմումները
քննարկել առանց իր մասնակցությամբ։

Դիմումների քննարկման արդյունքում պարզվել է, որ վարչական ակտերը ենթակա են
կատարման հետևյալ պատճառաբանությամբ.

<<Ճանապարհային երթևեկության անվտանգության ապահովման մասին>> օրենքի 24-
րդ հոդվածի 5-րդ մասի <<բ>> կետի համաձայն՝ մեխանիկական տրանսպորտային միջոցի
վարորդը պարտավոր է՝ կառուցվածքով նախատեսված անվտանգության գոտիներով
կահավորված տրանսպորտային միջոցներով երթևեկելիս լինել ամրակապված և չփոխադրել
անվտանգության գոտիներով չամրակապված ուղևորների։ Նույն հոդվածի 7-րդ մասի <<գ>>
կետի համաձայն՝ վարորդին արգելվում է ընթացքի ժամանակ օգտվել ռադիոկապից և
հեռախոսակապից, եթե դրանք կահավորված չեն առանց ձեռքերի օգտագործման այդ
սարքերից օգտվելու սարքավորումներով (բացառությամբ ծառայողական առաջադրանքներ
կատարող, օպերատիվ ծառայությունների տրանսպորտային միջոցների վարորդների), կամ
ընթացքի ժամանակ ծխել։

Վարչական իրավախախտումների վերաբերյալ << օրենսգրքի 123.3-րդ հոդվածի
համաձայն՝ օրենքով նախատեսված դեպքերում տրանսպորտային միջոցների
անվտանգության գոտիները չամրակապած կամ սաղավարտը չկոճկած վիճակում կամ
առանց սաղավարտի տրանսպորտային միջոցներ վարելը, ինչպես նաև անվտանգության
գոտիները չամրակապած կամ սաղավարտը չկոճկած կամ առանց սաղավարտի ուղևոր
փոխադրելը՝ առաջացնում են տուգանքի նշանակում՝ սահմանված նվազագույն

աշխատավարձի տասնապատիկի չափով, տուգանային միավորի կիրառում՝ 1 միավոր: Նույն օրենսգրքի 135.2-րդ հոդվածի 1-ին մասի համաձայն՝ տրանսպորտային միջոցի (բացառությամբ սույն հոդվածի 2-րդ մասով նախատեսված տրանսպորտային միջոցների) վարորդի կողմից տրանսպորտային միջոցի ընթացքի ժամանակ ծխախոտային արտադրատեսակ կամ ծխախոտային արտադրատեսակների փոխարինիչներ օգտագործելը՝ առաջացնում է տուգանքի նշանակում՝ սահմանված նվազագույն աշխատավարձի յոթնապատիկի չափով, և տուգանային միավորի կիրառում՝ 0.5 միավոր: Նույն օրենսգրքի 35-րդ հոդվածի համաձայն՝ մեկ անձի կողմից երկու կամ ավելի վարչական իրավախախտումներ կատարելու դեպքում վարչական տույժը նշանակվում է յուրաքանչյուր իրավախախտման համար առանձին-առանձին: Նույն օրենսգրքի 299-րդ հոդվածի համաձայն՝ նույն անձի նկատմամբ վարչական տույժեր նշանակելու մասին մի քանի որոշումներ կայացվելու դեպքում յուրաքանչյուր որոշում ի կատար է ածվում առանձին-առանձին:

Ուսումնասիրությամբ պարզվել է, որ 20.03.2023թ. ժամը 12:10-ի սահմաններում Արմավիր քաղաքի Երևանյան փողոցի հատվածում քաղաքացի Խաչատուր Իվանյանի վարած <<GAZ>> մակնիշի 37NX701 հաշվառման համարանիշի ավտոմոբիլը կանգնեցվել է Ճանապարհային ոստիկանության ՃՊԾ 2-րդ սպայական գումարտակի 1-ին սպայական վաշտի 1-ին սպայական դասակի տեսուչ, ոստիկանության կապիտան Լ.Զախարյանի և նույն դասակի տեսուչ, ոստիկանության մայոր Ա.Զոհրաբյանի կողմից՝ <<Ճանապարհային երթևեկության անվտանգության ապահովման մասին>> օրենքի 24-րդ հոդվածի 5-րդ մասի <<բ>> և 7-րդ մասի <<գ>> կետերի պահանջների խախտման համար, այն է՝ վարորդն ավտոմոբիլը վարել է անվտանգության գոտիով չամրակապված վիճակում և ընթացքի ժամանակ օգտագործել է ծխախոտային արտադրատեսակ կամ ծխախոտային արտադրատեսակների փոխարինիչ: Կազմվել են համապատասխան վարչական իրավախախտումների վերաբերյալ արձանագրություններ, որտեղ վարորդը իրեն հատկացված տեղերում նշել է իր գրավոր անհամաձայնությունը և Վարչական իրավախախտումների վերաբերյալ << օրենսգրքի 123.3-րդ հոդվածով և 135.2-րդ հոդվածի 1-ին մասով կայացվել են վարչական իրավախախտումների վերաբերյալ գործերով ԱՆ075608 և ԱՆ075609 որոշումները:

Ճանապարհային ոստիկանության ծառայողների կողմից Ճանապարհային ոստիկանության վարչական բողոքների քննության բաժնում տրված գրավոր բացատրությունների համաձայն՝ քաղաքացի Խաչատուր Իվանյանի կողմից կատարված իրավախախտումները հիմնավորող՝ տեխնիկական միջոցների կիրառմամբ ձեռք բերված ապացույցներ առկա չեն, սակայն իրավախախտումները եղել են անմիջապես իրենց տեսադաշտում, ակնհայտ և պարզ տեսանելի: Վարորդի ներկայությամբ և մասնակցությամբ կազմվել են համապատասխան վարչական իրավախախտումների վերաբերյալ արձանագրություններ և կայացվել են ԱՆ075608 և ԱՆ075609 որոշումները: Միաժամանակ ոստիկանության ծառայողները հայտնել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

<<Ճանապարհային երթևեկության անվտանգության ապահովման մասին>> օրենքի 17-րդ հոդվածի 1-ին մասի <<ա>> կետի համաձայն՝ ճանապարհային երթևեկությունը կարգավորող ոստիկանության ծառայողը պարտավոր է սույն հոդվածի երրորդ մասով սահմանված կարգով ազդանշան տալով կանգնեցնել տրանսպորտային միջոցը, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները, կամ տրանսպորտային միջոցի ընթացքը կամ տեղափոխվող բեռը, կամ վարորդը կամ ուղևորներն իրենց վարքագծով ակնհայտորեն վտանգ են ստեղծում երթևեկության անվտանգության համար: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջանում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Հարկ է նշել, որ Վարչական իրավախախտումների վերաբերյալ ՀՀ օրենսգրքի 123.3-րդ հոդվածի և 135.2-րդ հոդվածի 1-ին մասի պահանջները խախտելու համար արարքները նվազ նշանակություն ունեցող գնահատելու կարգ սահմանված չէ (անզգուշություն, դիտավորություն և այլն):

Այսպիսով, դիմումատուի արարքներում առկա են Վարչական իրավախախտումների վերաբերյալ ՀՀ օրենսգրքի 123.3-րդ հոդվածի և 135.2-րդ հոդվածի 1-ին մասի հատկանիշները, հետևաբար նրան վարչական պատասխանատվության ենթարկելու մասին վերը նշված որոշումներն օրինական են և իրավաչափ:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտումների վերաբերյալ գործերով 20.03.2023թ. կայացված ԱՆ075608 և ԱՆ075609 որոշումները թողնել անփոփոխ, իսկ վարչական բողոքներն առանց բավարարման.
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ Վարչական դատարան օրենքով սահմանված կարգով և ժամկետներում.
3. Սույն որոշման օրինակն ուղարկել Խաչատուր Իվանյանին:



Ն. Սարգսյան